




初唐四傑集
 盧昇之集
 庚

詩文初集
 七

土岐文庫
 文庫17
 W54
 7



文庫 17
W54
7

唐書文苑傳

盧照鄰字昇之幽州范陽人也年十餘歲就曹憲王義方授蒼雅及經史博學善屬文初授鄧王府典籤王甚愛重之曾謂羣官曰此卽寡人相如也後拜新都尉因染風疾去官處太白山中以服餌爲事後疾轉篤徙居陽翟之具茨山著釋疾文五悲等誦頗有騷人之風甚爲文士所重照鄰旣沈痼孳廢不堪其苦嘗與親屬執別遂自投潁水而死時年四十文集二十卷兄光乘亦知名長壽中爲隴州刺史

盧昇之集

本傳

二 藝雅居

昭和六十年二月一日贈
五岐善吉唐氏寄

010185191392

盧昇之集目錄

卷一

賦

秋霖賦

馴鳶賦

窮魚賦 并序

雙槿樹賦同崔少監作 并序

病梨樹賦 并序

樂府

中和樂九章

歌登封第一

歌明堂第二

歌東軍第三

歌南郊第四

歌中宮第五

歌儲宮第六

歌諸王第七

歌公卿第八

總歌第九

卷二

五言古詩

詠史四首

結客少年場行

贈李榮道士

奉使益州至長安發鍾陽驛

和王奭秋夜有所思

望宅中樹有所思

宿晉安寺

一作亭

於時春也慨然有江湖之思寄贈柳九隴

赤谷安禪師塔

贈益府裴錄事

贈益府羣官

七言古詩

失羣雁

并序

行路難

長安古意

明月引

懷仙引

五言律詩

劉生

隴頭水

巫山高

芳樹

雨雪曲

昭君怨

折楊柳

梅花落

關山月

上之回

紫駟馬

戰城南

十五夜觀燈

入秦川界

文翁講堂

相如琴臺

石鏡寺

辛司法宅觀妓

春晚山莊率題二首

江中望月

元日述懷

益州城西張超亭觀妓

還京贈別

至陳倉曉晴望京邑

晚渡滹沱敬贈魏大

和吳侍御被使燕然

七夕泛舟二首

送梓州高參軍還京

大劍送別劉右史

卷三

五言排律

同臨津紀明府孤雁

西使兼送孟學士南遊

送鄭司倉入蜀

綿州官池贈別同賦灣字

還赴蜀中貽示京邑遊好

和夏日幽莊

山莊休沐

山林休日田家

宴梓州南亭得池字

山行寄劉李二參軍

首春貽京邑文士

贈許左丞從駕萬年宮

晚渡渭橋寄示京邑遊好

羈卧山中

酬張少府柬之

過東山谷口

送幽州陳參軍赴任寄呈鄉曲父老

哭金部韋郎中

哭明堂裴主簿

同崔錄事哭鄭員外

至望喜矚目言懷貽劍外知己

早度分水嶺

三月曲水宴得尊字

五言絕句

登玉清

曲池荷

浴浪鳥

臨階竹

含風蟬

葭川獨泛

送二兄入蜀

宿元武二首

九隴津集

遊昌化山精舍

七言絕句

登封大醮歌四首

九月九日登元武山

卷四

騷

五悲 并序

悲才難

悲窮道

悲昔遊

悲今日

悲人生

獄中學騷體

卷五

騷

釋疾文 并序

粵若

悲夫

命曰

卷六

序

駙馬都尉喬君集序

南陽公集序

樂府雜詩序

宴梓州南亭詩序

宴鳳泉石翁神祠詩序

七日綿州泛舟詩序

楊明府過訪詩序

對問

對蜀父老問

卷七

書

與在朝諸賢書

與洛陽名流朝士乞藥直書

寄裴舍人諸公遺衣藥直書

讚

相樂夫人檀龕讚

益州長史胡樹禮為亡女造畫讚

碑

益州至真觀主黎君碑

盧昇之集目錄

盧昇之集卷一

賦

秋霖賦

覽萬物兮竊獨悲此秋霖風橫天而瑟瑟雲覆海而沈沈
 居人對之憂不解行客見之思已深若乃千井埋煙
 百塵涵潦青苔被壁綠萍生道於時巷無人跡林無鳥
 聲野陰霾而因晦山幽曖而不明長塗未半茫茫漫漫
 莫不埋輪據鞍銜悽茹歎借如尼父去魯圍陳畏匡將
 饑不爨欲濟無梁問長沮與桀溺逢漢陰與楚狂長櫛



風而沐雨永栖栖以遑遑及夫屈平旣放登高一望湛
湛江水悠悠千里泣故國之長楸見元雲之四起嗟乎
子卿北海伏波南川金河別雁銅柱辭鳶關山天骨霜
木凋年眺窮陰兮斷地看積水兮連天別有東國儒生
西都才客屋漏鉛槧家虛儋石茅棟淋淋蓬門寂寂蕪
碧草於園徑聚綠塵於庖甕玉爲粒兮桂爲薪堂有琴
兮室無人抗高情以出俗馳精義以入神論有能鳴之
雁書成已泣之麟覩皇天之涇溢孰不隅坐而含嘆已
矣哉若夫繡轂銀鞍金杯玉盤坐臥珠璧左右羅紈流
酒爲海積肉爲巒視襄陵而與昏墊曾不輟乎此歡豈
知乎堯禹之臞瘠而孔墨之艱難

馴鳶賦

孕天然之靈質稟大塊之奇工嘴距足以自衛毛羽足
以凌風懷九圍之遠志託萬里之長空陰雲低而含紫
陽景升而帶紅經過巫峽之下惆悵彭門之東旣而摧
頽短翮寥落長想息蒙莊之見欺哀武溪之莫往進謝
扶搖之力退慙歸昌之響腐食多懼層巢無像屈猛性
以自馴抱愁容而就養於是傍眺德門言棲仁路不踐

高粱之屋翔止吾人之樹聽羣雞於月曉侶羣雀于星
暮狎蘭砌之高低翫荆扉之新故循廣庭之一息歷長
簷而逕度若乃風去雨還河移月落徘徊亂於雙燕鳴
舞均乎獨鶴乍嘯聚於霞莊時追飛於雲閣荷大德之
純粹將輕姿之陋薄思一報之無階欣百齡之有託

窮魚賦 并序

余曾有橫事被拘爲羣小所使將致之深議友人救護
得免竊感趙壹窮鳥之事遂作窮魚賦常思報德故冠
之篇首云

有一巨鱗東海波臣洗淨月浦涵丹錦津映紅蓮而得
性戲碧浪以全身宕而失水屈于陽灑漁者觀焉乃具
竿索集朋黨鳧趨雀躍風馳電往競下任公之釣爭陳
豫且之網螻蟻見而甘心獮獺聞而抵掌于是長舌利
嘴曳綸爭鉤拖鬚挫鬣撫背扼喉動搖不可騰躍無由
有懷織潤寧望洪流大鵬過而哀之日昔予爲鯢也與
是遊乎自予羽化之子其孤俄撫翼而下負之而趨南
浮七澤東汎五湖是魚也已相忘於江海而漁者猶悵
望於泥塗

雙槿樹賦同崔少監作 并序

日昨於著作局見諸著作競寫雙槿樹賦蓬萊山上卽對神仙芸香閣前仍觀祕寶金懸秦市場子見而無言紙貴洛城陸生聞而罷笑故知柔條朽幹吹噓變其死生落葉凋花翦拂成其光價方且傳石渠之故事得槿樹之新名足以脂粉仙臺丹青祕府者也若布衣藜杖巖栖藿食居周室而非史處漢代而無田學涉燕淺文多瞽漏宜其屏竄用其靜默蓋窮而思達人之情也卑而應高物之理也故疾雷作而蟄蟲飛浮雲興而石礪

潤不可廢也雖云聖朝多士而公實居之草澤有人亦國家之美事也故復獎刷芻鄙作雙槿樹賦詞義猥薄退增慙說賦曰而不賦則亦不賦矣
方丈蓬萊邈矣悠哉芸扃石室圖天揆日若乃羲和掌日太史觀星銅渾玉策寶笥金銘地則圖書之府人則神仙之靈中有芳薜鬱鬱亭亭徒觀其兩砌分植雙階並耀葉鏤五衢榮分四照紛廣庭之霍靡隱重廊之窈窕青陸至而鶯啼朱陽升而花笑紫蒂紅蕤玉蘂蒼枝露華的皪風色徘徊采粲照灼婀娜隈綉迨而視之鳴

環動佩歌扇開遠而望之連珠合璧星漢迴狀仙人之
羽蓋疑佚女之瑤臺寂寞攸利栖閒此地委命卷舒隨
時榮悴外無嬰天之禍內有逍遙之致朝朝暮暮落復
開歲歲年年紅以翠若夫遊蜂戲蝶封其萼輕烟弱霧
絡其條去不謂之損來不謂之饒故能出君子之殊俗
入詩人之舊謠齊顯昧於兩曜效生死於一朝同喪我
之非我固雖凋而不凋則有亭伯儒門令思詩友翰苑
擴其吞夢文鋒高而照斗詠蕪滋之朝夕悲積薪之先
後縟繡起于緹紡煙霞生于灌莽豈與巖幽弱篠澗底

枯松徒冒霜而停雪空集鳳而吟龍詎得奉仙闈之廣
價連筆匠之爲容已矣哉東方生聞而歎曰故年花落
不留人今年花發非故春條兮夕隕忽兮朝新侏儒何
功兮短飽曼倩何負兮長貧聊寄詞於庭樹倘有感於
平津

病梨樹賦 并序

癸酉之歲余臥病于長安光德坊之官舍父老云是鄆
陽公主之邑司昔公主未嫁而卒故其邑廢時有處士
孫君思邈居之君道洽今古學有數術高談正一則古

之蒙莊子深入不二則今之維摩詰及其推步甲子度
量乾坤飛鍊石之奇洗胃腸之妙則其甘公洛下閔安
期先生扁鵲之儔也自云開皇辛丑歲生今年九十三
矣詢之鄉里咸云數百歲人矣共語周齊間事歷歷如
眼見以此參之不啻百歲人也然猶視聽不衰神形甚
茂可謂聰明博達不死者矣余年垂強仕財有幽憂之
疾椿菌之性何其遠哉于時天子避暑甘泉邈亦徵詣
行在余獨臥病茲邑闕寂無人伏枕十旬閉門三月庭
無眾木唯有病梨樹一株圍纔數握高僅盈丈花實惟
悴似不任乎歲寒枝葉零丁絕有意乎朝暮嗟乎同托
根于膏壤俱稟氣於太和而修短不均榮枯殊貫豈賦
命之理得之自然將資生之化有所偏及樹猶如此人
何以堪有感於懷賦之云耳

天象平運方祇廣植挺芳桂於月輪橫扶桑於日域建
木聳靈邱之上蟠桃生巨海之側細葉枝連洪柯條直
齊天地之一指任烏兔之棲息或垂陰萬畝或結子千
年何偏施之雨露何獨厚之風煙愍茲珍木離離幽獨
飛茂實于河陽傳芳名于金谷紫澗稱其殊旨元光表

其仙族爾生何爲零丁若斯無輪桐之可用無梁棟之
可施進無違于斤斧退無競于班倕無庭槐之生意有
巖桐之死枝爾其高纜數仞圍僅盈尺修幹罕雙枯條
每隻葉病多紫花凋少白夕鳥怨其巢危秋蟬悲其翳
窄怯衝颯之搖落异炎景之臨迫既而地歇蒸霧天收
耀靈西秦明月東井流星憔悴孤影徘徊直形狀金莖
之的的疑石柱之亭亭若夫西海夸父之林南海蚩尤
之樹莫不摩霄拂日藏雲吐霧別有橋邊朽柱天上靈
槎年年歲歲無葉無花榮辱兩齊吉凶同軌寧守雌以
外喪不修禳而內否亦猶縱酒高賢佯狂君子爲其胞
合置其憂喜生非我生物謂之生死非我死谷神不死
混彭殤于一觀庶筌蹄于茲理

樂府

中和樂九章

歌登封第一

炎圖喪寶黃歷開璿祖武類帝宗文配天玉鑿垂日翠
華凌煙東雲干呂南風入絃山稱萬歲河慶千年金繩
永結璧麗長懸

歌明堂第二

穆穆聖皇雍雍明堂左平右城上圓下方調均風雨制
度陰陽四窗八達五室九房南通夏火西瞰秋霜天子
臨御萬玉鏘鏘

歌東軍第三

遐哉廟畧赫矣台臣橫戈礪石倚劍浮津風邱拂稷日
域清塵烏夷復祀龍伯來賓休兵寓縣獻馘天闔旆海
凱入耀輝震震

歌南郊第四

虔郊上帝肅事圓邱龍駕四牡鸞旗九旂鐘歌晚引紫
煬高浮日麗蒼壁雲飛鳴球皇之慶矣萬歲千秋

歌中宮第五

祥遊沙麓慶洽瑤衣黃雲晝聚白氣宵飛居中履正稟
和體微儀刑赤縣演教椒闈陶鈞萬國丹青四妃河洲
在詠風化攸歸

歌儲宮第六

波澄少海景麗前星高禔誕聖甲觀昇靈承規翠所問
寢瑤庭宗儒側席問道橫經山賓皎皎國胄青青黃裳

元吉邦家以寧

歌諸王第七

星陳帝子嶽列天孫義光帶礪象著乾坤我有明德
建攸存苴以茅社錫以犧尊藩屏王室翼亮堯門八才
兩獻夫何足云

歌公卿第八

蹇蹇三事師師百寮羣龍在職振鷺盈朝豐金輝首佩
玉鳴腰青蒲翼翼丹地翹翹歌雲佐漢捧日匡堯天工
人代邈邈昭昭

總歌第九

明明天子兮聖德揚穆穆皇后兮陰化康登若木兮坐
明堂池濛汜兮家扶桑武化偃兮文化昌禮樂昭兮股
肱良君臣已定兮君永無疆顏子更生兮徒皇皇若有
人兮天一方忠為衣兮信為裳餐白玉兮飲瓊芳心思
荃兮路阻長

盧昇之集卷之二
九
鄒氏刊

盧昇之集卷之二

番禺王國瑞覆校

番禺沈葆和初校
番禺王國瑞覆校

盧昇之集卷之二

五言古詩

詠史四首

季生昔未達身辱功不成
髡鉗為臺隸灌園變姓名
幸逢滕將軍兼遇曹邱生
漢祖廣招納一朝拜公卿
百金孰云重一諾良匪輕
廷議斬樊噲羣公寂無聲
處身孤且直遭時坦而平
丈夫當如此唯唯何足榮

昔有平陵男姓朱名阿游
直髮上衝冠壯氣橫三秋
願得斬馬劍先斷佞臣頭
天子玉檻折將軍丹血流
捐生

不肯拜視死真若休歸來教鄉里童蒙遠相求弟子數
百人散在十二州三公不敢吏五鹿何能酬名與日月
懸義與天壤儔何必疲執戟區區在封侯偉哉曠達士
知命固不憂

大漢昔云季小人道遂振玉帛委奄尹斧鑕嬰縉紳邈
哉郭先生卷舒得其真雍容謝朝廷談笑獎人倫在晦
不絕俗處亂不爲親諸侯不得友天子不得臣冲情甄
負甌重價折角巾悠悠天下士相送洛橋津誰知仙舟
上寂寂無四鄰

公業負奇志交結盡才雄良田四百頃所食常不充一
爲侍御史慷慨說何公何公何爲敗吾謀適不同仲穎
恣殘忍廢興良在躬死人如亂麻天子如轉蓬干戈及
黃屋荆棘生紫宮鄭生運其謀將以清國戎時來命不
遂脫身歸山東凜凜千載下穆然懷清風

結客少年場行

長安重遊俠洛陽富才雄玉劍浮雲騎金鞭明月弓關
雞過渭北走馬向關東孫賓遙見待郭解暗相通不受
千金爵誰論萬里功將軍下天上虜騎入雲中烽火夜

似月兵氣曉成虹橫行徇知己負羽遠從戎龍旌昏朔
霧鳥陣捲寒風追奔瀚海咽戰罷陰山空歸來謝天子
何如馬上翁

贈李榮道士

錦節銜天使瓊仙駕羽君投金翠山曲莫璧清江瀆圓
洞開丹鼎方壇聚絳雲寶一作資 賦幽難識空歌迴易分
風搖十洲影日亂九江文敷誠歸上帝應詔佐明君獨
有南冠客耿耿泣離羣遙看八會所真氣曉氛氲

奉使益州至長安發鍾陽驛

躋險方未夷乘春聊騁望落花赴丹谷奔流下青嶂歲
穠曉樹滋滉瀆春江漲平川看釣侶狹逕聞樵唱蝶戲
綠苔前鶯歌白雲上耳目多異賞風煙有奇狀峻阻埒
長城高標吞巨舫聯翩事羈勒辛苦勞疲恙夕濟幾潺
湲晨登每惆悵誰念復芻狗山河獨偏喪

和王爽秋夜有所思

寂一作秋南軒夜悠然懷所知長河落雁苑明月下鯨
池鳳臺有清曲此曲何人吹丹脣間玉齒妙響入雲涯
窮巷秋風葉空庭寒露枝勞歌欲有和星鬢已將垂

望宅中樹有所思

我家有庭樹秋葉正離離上舞雙棲鳥中秀合歡枝勞
思復勞望相見不相知何當共攀折歌笑北堂垂

宿晉安寺

一作亭

聞有絃歌地穿鑿本多奇遊人試一覽臨翫果忘疲
橫暮捲一作落葉簷臥古生枝舊石開紅蘚新荷覆綠池
孤猿稍斷絕宿一作百鳥復參差汎灩月華曉徘徊星鬢
垂今日刪書客悽惶君詎知

於時春也慨然有江湖之思寄贈柳九隴

提琴一萬里負書三十年晨攀偃蹇樹暮宿清冷泉翔
禽鳴我側旅獸過我前無人且無事獨酌還獨眠遙聞
彭澤宰高弄武城絃形骸寄文墨意氣託神仙我有壺
中要題爲物外篇將以貽好道道遠莫致旃相思勞日
夜相望阻風煙坐惜春華晚徒令客思懸水去東南地
氣凝西北天關山悲蜀道花鳥憶秦川天子何時問公
卿本亦一作不憐自哀還自樂歸藪復歸田海屋銀爲棟
雲車電作鞭倘遇鸞將鶴誰論貂與蟬萊洲頻度淺桃
實幾成圓寄言飛鳥曷歲晏同一作共聯翩

赤谷安禪師塔

獨坐巖之曲悠然無俗氛酌酒呈丹桂思詩贈白雲烟
霞朝晚聚猿鳥歲時聞水華競一作鏡秋色山翠含夕曛
高談十二部細覈五千文如如數冥昧生生理氤氲古
人有糟粕輪扁情未分且當事芝朮從吾所好云

贈益府裴錄事

忽忽歲云暮相望限風烟長歌欲對酒危坐遂停絃停
絃變霜露對酒懷朋故朝看桂蟾晚夜聞鴻雁度鴻度
何時還桂晚不同攀浮雲映丹壑明月滿青山青山雲
路深丹壑月華臨耿耿離憂積空令星鬢侵

贈益府羣官

一鳥自北燕飛來向西蜀單棲劍門上獨舞崑一作山
足昂藏多古貌哀怨有新曲羣鳳從之遊問之何所欲
答言寒鄉子飄飄萬餘里不息惡木枝不飲盜泉水常
思稻梁遇願棲梧桐樹智者不我邀愚夫余不顧所以
成獨立耿耿歲云暮日夕苦風霜思歸赴洛陽羽翮毛
衣短關山道路長明月流客思白雲迷故鄉誰能借風
便一舉凌蒼蒼

七言古詩

失羣雁 并序

温縣明府以雁詩垂示余以為古之郎官出宰百里今之墨綬入應千官事止雁行未宜傷嘆至如羸臥空巖者乃可為失羣慟耳聊因伏枕多暇以斯文應之

三秋北地雪皚皚萬里南翔渡海來欲隨石燕沈湘水試逐銅烏繞帝臺帝臺銀闕距金塘中間鵷鷺已成行先過上苑傳書信暫下中州戲稻梁虞人負繳來相及齊客虛弓忽見傷毛翎頓頓一作憔悴飛無力羽翮摧頽君

不識唯有莊周解愛鳴復道郊歌一作哥重奇色惆悵驚

思悲未已徘徊自憐中罔極傳聞有鳥集朝陽詎勝仙鳧邇帝鄉雲間海上應鳴舞遠得鷓絃猶獨撫金龜全寫中牟印玉鵠當變萊蕪釜願君弄影鳳凰池時憶籠

中摧折羽

行路難

君不見長安城北渭橋邊枯木橫槎臥古田昔日含紅復含紫當時留霧亦留煙春景春風花似雪香車玉輦恆闌咽若個遊人不競攀若個倡家不來折倡家寶袜

蛟龍岐公子銀鞍千萬騎黃鶯一一向花嬌青鳥雙雙
將子戲千尺長條百尺枝月桂星榆相蔽虧珊瑚葉上
鴛鴦鳥鳳凰巢裏雛鷓兒巢傾枝折鳳歸去條枯葉落
任風吹一朝憔悴無人問萬古摧殘君詎知人生貴賤
無終始倏忽須臾難久恃誰家能駐西山日誰家能堰
東流水漢家陵樹滿秦川行來行去盡哀憐自昔公卿
二千石咸擬榮華一萬年不見朱脣將玉貌唯聞青棘
與黃泉金貂有時須換酒玉塵恆搖莫計錢寄言坐客
神仙署一生一死交情處蒼龍闕下君不留白鶴山頭
我應去雲間海上邈難期赤心會合在何時但願堯年
一百萬長作巢由也不辭

長安古意

長安大道連狹斜青牛白馬七香車玉輦縱橫過主第
金鞭絡繹向侯家龍銜寶蓋承朝日鳳吐流蘇帶晚霞
百丈遊絲爭繞樹一羣嬌鳥共啼花遊蜂戲蝶千門側
碧樹銀臺萬種色複道交牕作合歡雙闕連甍垂鳳翼
梁家畫閣天中起漢帝金莖雲外直樓前相望不相知
陌上相逢詎相識借問吹簫向紫烟曾經學舞度芳年

得成比目何辭死願作鴛鴦不羨仙比目鴛鴦真可羨
雙去雙來君不見生憎帳額繡孤鸞好取門簾帖雙燕
雙燕雙飛繞畫梁羅幃翠被鬱金香片片行雲著蟬鬢
纖纖初月上鴉黃鴉黃粉白車中出含嬌含態情非一
妖童寶馬鐵連錢倡婦盤龍金屈膝御史府中烏夜啼
廷尉門前雀欲栖隱隱朱城臨玉道遙遙翠幃沒金提
挾彈飛鷹杜陵北探丸借客渭橋西俱邀俠客芙蓉劍
共宿倡家桃李蹊倡家日暮紫羅裙清歌一轉口氛氲
北堂夜夜人如月南陌朝朝騎似雲南陌北堂連北里
五劇三條控三市弱柳青槐拂地垂佳氣紅塵暗天起
漢代金吾千騎來翡翠屠蘇鸚鵡杯羅襦寶帶爲君解
燕歌趙舞爲君開別有豪華稱將相轉曰回天不相讓
意氣由來排灌夫專權判不容蕭相專權意氣本英雄
青虬紫燕坐春生一作風自言歌舞長千載自謂驕奢凌
五公節物風光不相待桑田碧海須臾改昔時金階白
玉堂卽今惟見青松在寂寂寥寥揚子居年年歲歲一
牀書獨有南山桂花發飛來飛去襲人裾

明月引

洞庭波起兮鴻雁翔風瑟瑟兮野蒼蒼浮雲卷靄明月
流光荆南兮趙北碣石兮瀟湘澄清規于萬里照離思
於千行橫桂枝於西第繞菱花於北堂高樓思婦飛蓋
君王文姬絕域侍子他鄉見胡鞍之似練知漢劍之如
霜試登高而騁一作極目莫不變而迴腸

懷仙引

若有人兮山之曲駕青虬兮乘白鹿往從之遊願心足
披礪戶訪巖軒石瀨潺湲橫石徑松蘿羃歷掩松門下
空濛而無鳥上巉巖而有猿懷飛閣度飛梁休余馬於

幽谷掛余冠於夕陽曲復曲兮煙莊遠行復行兮天路
長修途杳其未半飛雨忽以茫茫山塊軋磴連蹇攀石
壁而無據泝泥溪而不前向無情之白日竊有恨於皇
天迴行遵故道通川遍流潦迴首望羣峰白雲一作雪正
溶溶珠爲闕兮玉爲樓青雲蓋兮紫霜一作霞襲天長地
久時相憶千齡萬代一來遊

五言律詩

劉生

劉生氣不平抱劍欲專征報恩爲豪俠死難在橫行翠

羽裝劍刀一作鞘黃金鏤飾馬鈴一作纓但令一顧重不
恹百身輕

隴頭水

隴坂高無極征人一望鄉關河別去水沙塞斷歸腸馬
繫千年樹旌懸九月霜從來共嗚咽皆是為勤王

巫山高

巫山望不極望望下朝氛莫辨啼猿樹徒看神女雲驚
濤亂水脈驟雨暗峯文霑裳卽此地況復遠思君

芳樹

芳樹本多奇年華復在斯結翠成新幄開紅滿故枝風
歸花歷亂日度影參差容色朝朝落思君君不知

雨雪曲

虜騎三秋入關雲萬里平雪似胡沙暗冰如漢月明高
關銀為闕長城玉作城節旄零落盡天子不知名

昭君怨

合殿恩中絕交河使漸稀肝腸隨玉輦形影向金微一作
漢地草應綠胡庭沙正飛願逐三秋雁年年一度歸

折楊柳

倡樓啓曙扉楊柳正依依鶯啼知歲隔條變識春歸露
葉凝愁黛風花落舞衣攀折將安寄軍中音信稀

梅花落

梅嶺花初發天山雪未開雪處疑花滿花邊似雪迴因
風入舞袖雜粉向妝臺匈奴幾萬里春至不知來

關山月

塞垣通碣石虜障一作陣抵祁連相思在萬里明月正孤
懸影移金岫北光斷玉門前寄書謝中婦愁看鴻雁天

上之回

回中道路險蕭關烽候多五營屯右地萬乘出西河單
于拜玉璽天子按雕戈振旅汾川曲秋風橫大歌

紫騮馬

騮馬照金鞍轉戰入皋蘭塞門風稍急長城水正寒雪
暗鳴珂重山長噴玉難不辭橫絕漠流血幾時乾

戰城南

將軍出紫塞冒頓在烏貪茄喧雁門北陣翼龍城南瑯
弓夜宛轉鐵騎曉驂驪應須駐白日爲待戰方酣

十五夜觀燈

錦里開芳宴蘭缸豔早年綉彩遙分地繁光遠綴天接
漢疑星落依樓似月懸別有千金笑來映九枝前

入秦川界

隴阪長無極蒼山望不窮石徑縈疑斷回流映似空花
開綠野霧鶯囀紫巖風春芳勿遽盡留賞故人同

文翁講堂

錦里淹中館岷山稷下亭空梁無燕雀古壁有丹青槐
落猶疑市苔深不辨銘良哉二千石江漢表遺靈

相如琴臺

聞有雍容地千年無四鄰園院風煙古池臺松檟春雲
疑作賦客月似聽琴人寂寂啼鶯一作鳥處空傷遊子神

石鏡寺

古墓芙蓉塔神銘松柏烟鸞沈仙鏡底花沒梵輪前銖
衣千古佛寶月兩重圓隱隱香臺夜鐘聲徹九天

辛司法宅觀妓

南國佳人至北堂羅薦開長裙隨鳳管促柱送鸞杯雲
光身後落雪態掌中回到愁金谷晚不怪玉山頽

春晚山莊率題二首

顧步三春晚田園四望通遊絲橫惹樹戲蝶亂依叢竹
懶偏宜水花狂不待風唯餘詩酒意當了一生中
田家無四鄰獨坐一園春鶯啼非選樹魚戲不驚綸山
水彈琴盡風花酌酒頻年華已可樂高興復留人

江中望月

江水向涪陽澄澄寫月光鏡圓珠溜徹弦滿箭波長沈
鉤搖兔影浮桂動丹芳延照相思夕千里共霑裳

元日述懷

筮仕無中秩歸耕有外臣人歌小歲酒花舞大唐春草

色迷三徑風光動四鄰願得長如此年年物候新

益州城西張超亭觀妓

落日明歌席行雲逐舞人江前飛暮雨梁上下輕塵冶
服看疑畫妝樓望似春高車勿遽返長袖欲相親

還京贈別

風月清江夜山水白雲朝萬里同爲客三秋契不凋戲
鳥分斷岸歸騎別高標一去仙橋道還望錦城遙

至陳倉曉晴望京邑

拂曙驅飛傳初晴帶曉涼霧斂長安樹雲歸仙帝鄉澗

流漂素沫巖景霽朱光今朝好風色延瞰極天莊

晚渡滹沱敬贈魏大

津谷朝行遠冰川夕望曛霞明深淺浪風卷去來雲澄
波泛月影激浪聚沙文誰忍仙舟上攜手獨思君

和吳侍御被使燕然

春歸龍塞北騎指雁門垂胡笳折楊柳漢使採燕支戍
城聊一望花雪幾參差關山有新曲應向笛中吹

七夕泛舟二首

汀葭蕭徂暑江樹起初涼水疑通織室舟似泛仙潢連

橈渡急響鳴棹下浮光日晚菱歌唱風烟滿夕陽

鳳杼秋期至鳧舟野望開微吟翠塘側延想白雲隈石
似支機罷槎疑犯宿來天潢殊漫漫日暮獨悠哉

送梓州高參軍還京

京洛風塵遠褒斜煙霧深北遊君似智南飛我異禽別
路琴聲斷秋山猿鳥吟一乖青巖酌空佇白雲心

大劍送別劉右史

金碧禺山遠關梁蜀道難相逢屬晚歲相送動征鞍地
咽綿川冷雲凝劍閣寒倘遇忠孝所為道憶長安

盧昇之集卷二

番禺沈葆和初校
番禺王國瑞覆校

盧昇之集卷三

五言排律

同臨津紀明府孤雁

三秋遠北地

一作雁

萬里向南翔河洲花稍白關塞葉初

黃避繳風霜勁懷書道路長水流疑箭動月照似弓傷
橫天無有陣度海不成行會刷能鳴羽還赴上林鄉

西使兼送孟學士南遊

地道巴陵北天山弱水東相看萬餘里共倚一征篷零
雨悲王粲清尊別孔融徘徊聞夜鶴悵望待秋鴻骨月

胡秦外風塵關塞中唯餘劍鋒在耿耿氣成虹

送鄭司倉入蜀

離人丹水北游客錦城東別意還無已離憂自不窮隴
雲朝結陣江月夜臨空關塞疲征馬霜氛落早鴻潘年
三十外蜀道五千中送君秋水曲酌酒對清風

綿州官池贈別同賦灣字

輶軒遵上國仙佩下靈關尊酒方無地聯纒喜暫攀離
言欲贈策高辯正連環野徑浮雲斷荒池春草斑殘花
落古樹度鳥入澄灣欲敘他鄉別幽谷有綿蠻

還赴蜀中貽示京邑遊好

藥宿花初滿章臺柳向一作尚飛如何正此日還望昔多
違悵別風期阻將乖雲會稀斂衽辭丹闕懸旗陟翠微
野禽喧戍鼓春草變征衣回顧長安道關山起夕霏

和夏日幽莊

聞有高蹤客耿介坐幽莊林壑人事少風煙鳥路長瀑
水含秋氣垂藤引夏涼苗深全覆隴荷上半侵塘釣渚
青鳧沒村田白鷺翔知君振奇藻還嗣海隅芳

山莊休沐

蘭署乘閒日蓬扉狎遁棲龍柯疎玉井鳳葉下金堤川
光搖水箭山氣上雲梯亭幽聞唳鶴窗曉聽鳴雞玉軫
臨風奏瓊漿映月攜田家自有樂誰肯謝青谿

山林休日田家

歸休乘暇日饁稼返秋場徑草疏王萼巖枝落帝桑耕
田虞訟寢鑿井漢機忘戎葵朝委露齊棗夜含霜南澗
泉初冽東籬菊正芳還思北窗下高臥偃羲皇

宴梓州南亭得池字

二條開勝跡大隱叶冲規亭閣分危岫樓臺遶曲池長

薄秋煙起飛梁古蔓垂水鳥翻荷葉山蟲咬

一作桂枝

遊人惜將晚公子愛忘疲願得迴三舍琴尊長若斯

山行寄劉李二參軍

萬里烟塵客三春桃李時事去紛無限愁來不自持狂
歌欲嘆鳳失路反占龜草礙人行緩花繁鳥度遲彼美
參卿事留連求友詩安知倦遊子兩鬢漸如絲

首春貽京邑文士

寂寂罷將迎門無車馬聲橫琴答山水披卷閱公卿忽
聞歲云晏倚杖出簷楹寒辭楊柳陌春滿鳳皇城梅花

扶院吐蘭葉繞階生覽鏡改容色藏書留姓名時來不
假問生死任交情

贈許左丞從駕萬年宮

聞道上之回詔蹕下蓬萊中樞移北斗左轄去南臺黃
山聞鳳笛清蹕侍龍媒曳日朱旗卷參雲金障開朝驂
五城柳夕宴柏梁杯漢時光如月秦祠聽似雷寂寂芸
香閣離思獨悠哉

晚渡渭橋寄示京邑遊好

我行背城關驅馬獨悠悠寥落百年事徘徊萬里憂途

遙日向夕時晚鬢將秋滔滔俯東逝耿耿泣西浮長虹
掩鈞浦落雁下星洲草變黃山曲花飛清渭流迸水驚
愁鷺騰沙起狎鷗一赴清泥道空思元灞遊

羈臥山中

臥壑迷時代行歌任死生紅顏意氣盡白璧故交輕澗
戶無人跡山牕聽鳥聲春色緣巖上寒光入溜平雪盡
松帷暗雲開石路明夜伴饑鼯宿朝隨馴雉行度溪猶
憶處尋洞不知名紫書常日閱丹藥幾年成扣鐘鳴天
鼓燒香厭地精倘遇浮邱鶴飄飄凌太清

酬張少府柬之

昔余與夫子相遇漢川陰
珠浦龍猶臥檀溪馬正沈
價重瑤山曲詞驚丹鳳林
十年睽賞慰萬里隔招尋
豪翰風期阻荆衡雲路深
鵬飛俱望昔蠖屈共悲今
誰謂青衣道還歎白頭吟
地接神仙礪江連雲雨岑
飛泉如散玉落日似懸金
重以瑤華贈空懷舞詠心

過東山谷口

不知名利險辛苦滯皇州
始覺飛塵倦歸來事綠疇
桃源迷處所桂樹可淹留
跡異人間俗禽同海上鷗
古苔依井被新乳傍崖流
野老堪成鶴山神或化鳩
泉鳴碧澗底花落紫巖幽
日暮滄龜殼天寒御鹿裘
不辨秦將漢寧知春與秋
多謝青溪客去去赤松遊

送幽州陳參軍赴任寄呈鄉曲父老

薊北三千里關西二十年
馮唐猶在漢樂毅不歸燕
人同黃鶴遠鄉共白雲連
郭隗池臺處昭王樽酒前
故人當已老舊壑幾成田
紅顏如昨日霜鬢似秋天
西蜀橋應毀東周石尚全
灞池水猶綠榆關月早圓
塞雲初上雁庭樹欲銷蟬
送君之舊國揮涕獨潸然

哭金部韋郎中

金曹初受拜玉地始含香翻同五日尹遽見一星亡賀
客猶扶路哀人遂上堂歌筵長寂寂哭位自一作日蒼蒼
歲時賓徑斷朝暮雀羅張書留魏主閣魂掩漢家牀徒
令永平帝千載罷撞郎

哭明堂裴主簿

締歡三十載通家數百年潘楊稱代穆秦晉忝姻連風
雲洛陽道花月茂陵田相悲共相樂交騎復交筵始謂
調金鼎如何掩玉泉黃公酒壚處青眼竹林前故琴無
復雪新樹但生烟遽痛蘭襟斷徒令寶劍懸客散同秋
葉人亡似夜川送君一長慟松臺路幾千

同崔錄事哭鄭員外

文學秋天遠郎官星位尊伊人表時彥飛譽滿司存楚
席光文雅瑤山侍討論鳳詞凌漢閣龜辯罩周圍已陪
東嶽駕將逝北溟鯤如何萬化盡空歎九飛魂白馬西
京驛青松北海門夜臺無曉箭朝奠有虛尊一代儒風
沒千年隴霧昏梁山送夫子湘水弔王孫僕本多悲淚
沾裳不待猿聞君絕絃曲吞恨更無言

至望喜矚目言懷貽劍外知己

聖圖夷九折神化掩三分緘愁赴蜀道題拙奉虞薰隱

嶙度深谷遙裊一作裔上高雲碧流遞縈注青山互糾紛

澗松咽風緒巖花濯露文思北常依馭圖南每喪羣一本

無以上四句無由召宣室何以答吾君

早度分水嶺

丁年遊蜀道斑鬢一作萬里向長安徒費周王粟空彈漢吏

冠馬蹄穿欲盡貂裘敝一作故轉寒層冰橫九折積石凌

七盤重谿既下漱峻峰亦上千隴頭聞戍鼓嶺外咽飛

湍瑟瑟松風急蒼蒼山月團傳語後來者斯路誠獨難

三月曲水宴得尊字

風煙彭澤里山水仲長園由來棄銅墨本自重琴尊高

情邈不嗣雅道今復存有美光時彥養德坐山樊門開

芳杜徑室距桃花源公子黃金勒仙人紫氣軒長懷去

城市高詠狎蘭蓀連沙飛白鷺孤嶼嘯元猿日影巖前

落雲花江上翻興闌車馬散林塘夕鳥喧

五言絕句

登玉清

絕頂橫臨日孤峯半倚天徘徊拜真老萬里見風煙

曲池荷

浮香繞曲岸圓影覆華池常恐秋風早飄零君不知

浴浪鳥

獨舞依盤石羣飛動輕浪奮迅碧沙前長懷白雲上

臨階竹

封霜連錦砌防露拂瑤階聊將儀鳳質暫與俗人諧

含風蟬

高情臨爽月急響送秋風獨有危冠意還將衰鬢同

葭川獨泛

倚棹春江上橫舟石岸前山暝行人斷迢迢獨泛仙

送二兄入蜀

關山客子路花柳帝王城此中一分手相顧憐無聲

宿元武二首

方心開曉色圓月下秋陰已乘千里興還撫一絃琴

庭搖北風柳院繞南溟禽累宿思方重窮秋嘆不深

九隴津集

落落樹陰紫澄澄水華碧復有翻飛禽徘徊疑曳舄

遊昌化山精舍

寶地乘峯出香臺接漢高稍覺真途近方知人事勞
七言絕句

登封大醮歌四首

明君封禪日重光天子垂衣歷數長九州四海常無事
萬歲千秋樂未央

日觀仙雲隨鳳輦天門瑞雪照龍衣繁絃綺席方終夜
妙舞清歌歡未歸

翠鳳逶迤登介邱仙鶴徘徊天上遊借問乾封何所樂
人皆壽命得千秋

千年聖主應昌期萬國淳風王化基請比上古無爲代
何如今日太平時

九月九日登元武山

九月九日眺山川歸心歸望積風煙他鄉共酌金花酒
萬里同悲鴻雁天

